



## **Komunikadu Imprensa 12 Maiu 2022**

### **JSMP fahe informasaun kona-ba prevensaun tráfiku umanu iha Timor-Leste: estudante barak rekoñese nunka hetan informasaun antes ne'e**

Iha 11 Maiu 2022, JSMP kompleta formasaun ba dala ikus kona-ba prevensaun Tráfiku umanu ba estudante universidade Dili (UNDIL) no Universidade da Paz (UNPAZ) iha salaun enkontru JSMP, Kolmera Dili. Totál partisipante ne'ebé mak hetan ona formasaun hamutuk nain 150.

Iha treinamentu prevensaun ba tráfiku umanu, JSMP fasilita matéria mak hanesan definisaun tráfiku umanu, oinsá halo prevensaun husi risku ba tráfiku umanu inklui oinsá lori krime tráfiku umanu ba iha justisa formál. Alende treinamentu, JSMP mós fahe informasaun ho tópiku hanesan ba comunidade sira liuhusi halo publikasaun iha jornal no fahe brosurá ba comunidade no estudante universitáriu sira.

“JSMP fi'ar katak ho treinamentu ba estudante universitáriu sira kona-ba prevensaun ba tráfiku umanu bele hasa'e duni estudante sira nia koñesimentu tanba maioria husi estudante sira deklara antes ne'e nunka hatene saida loos mak tráfiku umanu no balun rekoñese depoisde treinamentu sira foin deskobre katak antes ne'e sira haree no rona duni kazu balun akontese iha sira nia sosiedade maibé sira la hatene katak tipu kazu sira hanesan tama ba iha kategoria krime tráfiku umanu,” dehan Sra. Ana Paula Marçal, Diretora Ezekutivu JSMP.

Iha treinamentu nia laran, estudante sira ativu tebe-tebes hodi husu pergunta kona-ba aktu prostituisaun ligasaun ho tráfiku umanu, justisa formal hasoru menoridade ne'ebé envolve iha tráfiku umanu no oinsá ho adultu sira ne'ebé fó sira nia konsentimentu hodi halo prostituisaun no mós traballu forsada tanba razaun laiha serbisu.

Hatan ba kestaun prostituisaun, JSMP esplika katak aktu prostituisaun ne'e nu'udar forma ida husi krime trafíku umanu, porezempu fetu husi estranjeiru mai iha Timor-Leste konsente atu halo prostituisaun maibé iha momentu nia mai halo vida prostituta ho manera sira hanesan lohi, bosok, transfere, transporta no aloja nafatin konsidera krime trafíku umanu ho forma prostituisaun mezmu nia rasik fó nia konsentimentu halo atividade ida ne'e. JSMP esplika mós katak artigu 174 husi Kódigu Penál deskreve krime esplorasau seksual deskreve maka aktu husi ema se deit ne'ebé ho intensaun atu hetan vantajen liuhusi fasilita atividade prostituisaun hanesan nia serbisu liron-loron no reforsa ho lei Nú. 03/2017 kona-ba Lei ba prevensaun no luta hasoru trafíku umanu ne'ebé konsidera aktu esplorasau seksual ba ema seluk iha kódigu penál nu'udar krime ho forma trafíku umanu.

Kestaun kona-ba serbisu forsada, JSMP esplika katak iha introdusaun Lei Nú. 3/2017 kona-ba prevensaun no luta hasoru trafíku umanu haktuir katak serbisu forsada nu'udar forma husi esplorasau ida tanba autór/trafikante hetan benefísiu serbisu adisionál ka seluk husi vítima no bain-bain prátika serbisu forsada autór/trafikante sees husi kontratu serbisu nian ka liu oras serbisu maibé laiha pagamentu.

Enkuantu kona-ba vítima sira iha kazu trafíku umanu ne'ebé konsiente atu hetan esplorasau tantu iha atividade prostituisaun no mós serbisu forsada ho razaun laiha kampu serbisu, JSMP esplika katak, aktu sira ne'e nafatin konsidera artigu 174 (a) define katak esplorasau ne'e sei kondena ho kastigu tinan 4 to'o tinan 12 bainhira halo ba ema sira ne'ebé hasoru abandona nune'e mós kona-ba serbisu forsada ne'ebé regula iha lei nú 3/2017 kona-ba prevensaun no luta hasoru trafíku umanu ne'ebé altera artigu 163 husi Kódigu Penál hodi deskreve sei la konsidera vítima sira nia konsentimentu ba kualkér aktu hotu ne'ebé deskreve iha artigu refere kuandu autór/trafikante uza meu sira hanesan rekruta, transfere, transporta, aloja ka akolle ho meu ameasa, koasaun, bosok ka lohi ho objetivu atu halo esplorasau.

Nune'e JSMP konsidera materia treinamentu prevensaun Trafíku umanu ne'e importante teb-tebes ba estudante no comunidade sira iha Timor-Leste tanba aktu trafíku umanu ne'e la'o hela no akontese iha sosiedade no dala barak alvu sira iha trafíku mak joven no ema vulneravel sira maibé joven no sosiedade konsidera hahalok ne'e normal tanba sira seidak iha koñesementu natoon kona-ba krime refere no oinsá bele prevene an husi aktu ida ne'e.

Atividade sira ne'e realiza ho apoio orsamentu husi Embaixada Amerika iha Timor-Leste liu husi UMA AMERIKA. JSMP agradese ba apoia ida-ne'e no kontinua serbisu hamutuk hodi bele kombate krime trafiku umanu iha Timor-Leste.

Atu hetan informasaun kompletu, favór kontaktu:

Ana Paula Marçal

Diretora Ezekutiva JSMP

Diresaun e-mail: [ana@jsmp.tl](mailto:ana@jsmp.tl)

Telefone: (+670) 33238883 | 77040735

Website: <https://jsmp.tl>

[info@jsmp.tl](mailto:info@jsmp.tl)